

四庫全書

集部

欽定四庫全書

後村集卷四

宋 劉克莊 撰

詩

南嶽第三稿

贈徐相師

許負遺書果是非子憑何處說精微使君豈必如柳大
丞相元來要瓠肥袖濶日常籠短刺肩寒春未換單衣
半頭布袋挑詩卷也道遊方賣術歸

送孫夢宮

大帝開江左無錐與遠孫自言埋戰地也勝活侯門短
褐邊風緊孤舟海浪翻知他三尺劍携去報誰恩

寄何立可提刑

故人握節守齊安聞說邊頭事愈難赤手募丁修險隘
白頭掇甲禦風寒半腰城甫包圍畢一把兵皆點摘殘
收得去年書在架憶君燈下展來看

和曾使君喜雨

雄烏忽變作雌霓太守為壇水畔祠多謝龍公來挹彼

寄聲風伯莫吹之
麥殘黑穠差傷晚秧出青鍼未過期
想見鈴齋聞點滴
銀鈎滿紙又成詩

送饒司理端學

一郡夸饒掾才名
果不虛忽聞歸去勇
極恨往還疎
囚戴公平德奴
擔性理書京華
逢舊友為說閉門居

贈防江卒六首

陌上行人甲在身
營中少婦淚痕新
邊城柳色連天碧
何必家山始有春

壯士如駒出渥洼死眠牖下等蟲沙老儒細為兒郎說
名將皆因戰起家

昨者邳徐表奏通聖朝除吏遍山東新來調卒防秋浦
又與山東報不同

身屬嫖姚性命輕君看一蟻尚貪生無因喚取談兵者
來向橋邊聽哭聲

戰地春來血尚流殘烽缺堠滿淮頭明時頗牧居深禁
若見關山也自愁

一炬曹瞞僅脫身謝郎棋畔走苻秦年年拈起防江字
地下諸賢為笑人

哭黃直卿寺丞二首

久在文公几杖旁暮年所得最精詳貧甘香火辭符竹
病整衣冠坐簟牀壯士軍中悲亮死先師地下惜回亡
法雲破寺三間屋却有門人遠赴喪

當年出塞共臨戎箭滿行營戍火紅督府凱旋先請去
堅城築就獨無功身謀彼此皆迂濶國事中間偶異同

莫怪些詞含哽噎
噎在時曾賞小詩工

不寐

萬戶千門盡擁衾
據梧展轉看橫參
不知身已成衰朽
枉被人疑是苦吟
周漢全書盲記憶
乾坤外事強思尋
華山山老差堪語
安得呼來論此心

寄夔漕王中甫

舊歲書猶至漢陽
新年夢已隔瞿塘
西人久苦供軍費
南士專營出峽裝
塵暗三邊途尚梗
身遊萬里鬢應蒼

蜀山間說多仙者試為余求辟穀方

送章通判

半刺已官尊常時讀魯論身居恭叔里心在晦翁門貧
士來遮路詩人送出村君能齊得喪何必戀華軒

早蓮

晴久方池可跣行萍枯惟有草縱橫朱葩未見叢叢拆
綠柄纔看寸寸生悴若放臣臨楚澤厄於學士蹈秦坑
輸他杭越花如錦畫舫名姝夜按笙

解柱帥辟書作

一昨聞公莫府開夢魂頻繞嶺頭梅久拋鞞袴辭軍去
忽有弓旌扣戶來茅舍相過爭借問荷衣欲出却徘徊
舊時檄筆今焚棄孤負黃金百尺臺

聞何立可李茂欽訃二首

初聞邊報暗吞聲想見登譙與敵爭世俗今猶疑許遠
君王元未識真卿傷心百口同臨穴極目孤城絕救兵
多少虎臣提將印誰知戰死是書生

何老長身李白鬚傳聞死尚握州符戰場便合營雙廟
太學今方出二儒史館何人徵逸士羽林無日訪遺孤
病夫疇昔曾同幕西望關山涕自濡

二君皆舊同官

夏旱

滿望梅天雨誰知日轉驕畦蔬新住摘盆樹久停澆米
貴糧困盡泉乾汲路遙未遑憂世事灾已到顏瓢

憶藕

昔過臨平召伯時小舟就買藕尤奇如拈玉塵涼雙手

似瀉金莖嚙上池好事染紅無意緒癡人蒸熟減風姿
炎州地狹陂塘少渴死相如欠藥醫

夜飲方湖

貪聽月下小叢歌擲去金焦吸碧荷四面涼如浮震澤
五更渴欲挽斜河古稱賢達誰存者今不懽娛奈老何
長笑峴山空感慨羊公湛輩兩消磨

哀江帥張常二首

關破壘猶堅傷心援不前生居諸將下死在衆人先憤

極拳雙握創多體少全豈無人策應擁轟坐江邊
昔我居戎幕為侯論戰勲齋旄烜赫書札尚殷勤國
難忠方見天高事未聞九江殘部曲暗哭故將軍

瀑上值雨

絕頂嵐烟合危亭略見簷不知山雨過但覺瀑流添悲
壯張瑤瑟迷濛展畫縑野人雙草屨來往任泥沾

懶

病入中年百事闌頽然一榻倦衣冠客方接話俄辭起

書未終編已輟看架壞儘教花卧蘚砌荒亦任草侵蘭
力求香火非無意疎散明知涉事難

送沈儔

考亭
門人

建學多通顯何為尚布衣不聞行聘久始悟設科非落
日君尋店深山我掩扉幾時殘燭下重聽講精微

紫微花

風標雅合對詞臣映硯窺窻伴演綸忽發一枝深谷裏
似知茅屋有詩人

書第二考

遙領叢祠又一年何功月請水衡錢江南塞北雖無分
林下山間尚有緣兵去未妨行酒令印收不礙掌詩權
祇嫌海嶠登臨少夢繞朱陵紫蓋邊

送鄭君瑞知閩清

茲邑猶淳古君行作長官假令三尺密終有一分寬粟
里歸差易桐鄉愛極難千峯青繞郭暇日想凭欄

猫捕燕

文采如彪膽智非畫堂巧伺燕雛微梁空賓客來俱訝
巢破雌雄去不歸鶯閉深籠防鷺性蝶飛高樹遠危機
主人寘在花整上飽卧徐行自養威

次方寺丞方湖韻

晚來吉語到茅椽太華詩翁約泛蓮况有鄒枚同預燕
可能李郭獨如仙帝猶給我還山俸天不需人買月錢
揮手闔門冠蓋客急歸勿擾甕間眠

隣家孔雀

初來毛羽錦青蔥
今與家雞飲啄同
童子有時偷剪翅
主人常日少開籠
嶠南歲月幽囚裏
隴右山川夢寐中
因笑世間真贗錯
綉身翻得上屏風

荅傅監倉

少豪頗似括談兵
老去方慙理未明
窻下殘書千遍讀
卷中一字幾回更
撚髭人盡嗤吾拙
軟血誰當豫此盟
肯啖菜根抄脫粟
許君十載共經營

蟾蜍硯滴

鑄出爬沙狀兒童競撫摩背如千歲者腹奈一輪何器
較餅嬰小功於几硯多所盛涓滴水後世賴餘波

讀崇寧後長編二首

自入崇寧政已荒由來治忽繫毫茫初為御筆行中旨
漸取兵權付右璫玉帶解來頒貴倖珠袍脫下賜降羌
諸公日侍鈞天讌不道流人死瘴鄉

陳迹分明斷簡中纔看卷首可占終兵來尚恐妨恭謝
事去徒知悔夾攻丞相自言芝產地太師頻奏鶴翔空

如何直到宣和季始憶元城與了翁

午窻

思賦支離粟一囊午牕卧看世人忙東家學究窮於我
六月袈衣上講堂

書感

仲尼已沒世無師新學專門各自私死守不為它說勝
祕藏似恐外人窺欲招程子看通典兼起歐公講繫辭
浩歎邇來者舊盡緒言分付與羣兒

答容

誰謂貧難忍三年閉戶居老兵能合藥小僕會抄書白
髮羞彈缺青山去荷鋤既於吟得趣功業合乘除

叩杖

珍重叩山鶴膝杖十年南北慣携持扶登石壁寧嫌峻
柱過溪橋肯避危昔涉畏途麾不去今行平地棄如遺
主人尚要防衰老會有重拈入手時

寄泉僧真濟

師邃於醫者聞諸諫議然若非禪性悟必有脉書傳藥
貴逢人施方靈尅日痊西風謁錫冷儻肯訪沉綿

羊毫筆

拔到髯生族多因兔穎稀只宜茅舍用難向玉堂揮弄
翰虛名似吹毛本質非兒曹貪賤鷓鴣掃如飛

空村

棄置在空村浮名豈復論因思戎服窄方悟縕袍尊城
遠雞司曉家貧犬守閭常怜劉越石辛苦戍并門

題齋壁

浩如烟海積如山紙上陳人叫不還
白首書生無事業
一生精力費牕間

題繫年錄

炎紹諸賢慮未精今追遺恨尚難平
區區王謝營南渡
草草江徐議北征
往日中丞甘結好
暮年都督始知兵
可憐白髮宗留守
力請鑾輿幸舊京

晚出

晚出別村幹夜深徒步歸飯猶懸早稼衣尚有隣機關
塞秋防急田園歲入微喟然投耒歎事事與心違

伏日

屋山竹樹帶疎蟬淨掃風軒散髮眠老子平生無長物
陶詩一卷枕屏邊

自警

筆枯硯燥自傷悲文體全闕氣盛衰倚馬縱難揮萬字
騎驢尚足課千詩奉盤誰可推盟主撼樹人方謗老師

疑有更深於此者入山十載試精思

詠隣人蘭花

兩盆去歲共移來一置雕闌一委苔
我拙事持令葉瘦君能調護遣花開
隸人挑蠹巡千匝稚子澆泉走幾迴
亦欲效顰耘小圃地荒終恐費栽培

夏夜

熱極不可度起行林影中開窻需過月
移簟就來風豪鼠喧深夜高蟬響半空
永言時物變露已濕莎叢

書田舍所見

漠漠晴埃起遠疇
仰占雲日幾家愁
細民方慮填中壑
巨室何心堰上流
斬木由來基小釁
澆瓜誰為解私仇
寧知送老茅簷下
猶抱書生畎畝憂

郊垌

所住在郊垌
田園事遍經
淺溝晴後塞
高隴雨餘青
屋潤隣翁富
祠新社鬼靈
南州無酒禁
十戶九旗亭

客過

客過柴門歎寂寥
旋挑野菜拾風樵
無錢輟贈開衣笈
有病來求採藥瓢
偶憇荒郊思種樹
每逢斷澗欲營橋
書生一念終迂濶
猶閱蒼黔與肖翹

孟浩然騎驢圖

壞墨殘縑閱幾春
灞橋風味尚如真
摩挲只可誇同社
裝飾應難奉貴人
舊向集中窺一面
今於畫裏識前身
世間老手惟工部
曾伏先生句句新

有興

有興駕柴車無心起草廬淺傾家釀酒細讀手抄書門
巷慵耘草園籬課種蔬雖非黃叔度未易得親疎

聞笛二首

少年毬馬逐秋風笛起連營響裂空今夕夢回村墅冷
一枝孤奏月明中

初如廢將哭窮邊又似孤臣訴左遷何必謝公雙淚落
野人聽罷亦淒然

健忘一首

昏昏健忘廢專精
默坐空齋忽自驚
少作回頭如兩手
舊書重讀似前生
却疑安世知三篋
不曉睢陽記一城
莫怪詩成呼燭寫
曉窻追憶欠分明

妄想

妄想如冰已盡消
朱顏日向鏡中凋
玉關萬里曾投筆
草市三家却負樵
弱水古來無路到
小山歲晚有人招
吾廬寂寂何須笑
君看閒僧住退寮

白社迓客一首

貧食官倉不自由，強扶衰病坐荒郵。
送迎不是祠官事，偶見青山急下頭。

七月九日二首

海激天翻電噍嗔，蒼松十丈劈為薪。
須臾龍卷它山去，誤殺田頭望雨人。

樵子俄從間路迴，因言溪谷響如雷。
分明雨怕城中去，只隔前峯不過來。

夢賞心亭

夢與諸賢會賞心恍然佳日共登臨酒邊多說烏衣事
曲裏猶殘玉樹音江水淮山明歷歷孫陵晉廟冷沉沉
曉鐘呼覺俱忘却獨記千門柳色深

郊行

一雨餞殘熱忻然思杖藜野田沙鶴立古木廟鴉啼失
僕行迷路逢樵負過溪獨遊吾有趣何必問栖栖

懷友

老鶴孤飛久失羣天涯懷友寸心勤狂生似膩寧堪近

佳士如香故可薰無復拏舟乘大雪有時倚杖送停雲
秋來選草深三尺誰伴青燈緝舊聞

牢落

牢落吾何恨先賢未免窮寧為田舍子不作國師公螢
影穿窻隙蛩聲出壁中殘書殊有味讀到角吹終

跋方雲臺文藁二十韻

文人何瑣碎夫子獨雄尊擊水移南海追風出大宛黑
潭龍怒起碧宇鷗孤鶩翕習波濤湧須臾電電奔筆鋒

山突兀墨瀋雨傾翻軒豁青天露淒迷白晝昏至微該
草樹極大括乾坤金鼓條侯壁旌旗渭上屯聚如羣玉
圃散似建章門覽岱親臨頂窮河直至源檄書傳絕漢
詩句落中原猛虎堪鬚捋修鯨可氣吞寂寥時數語浩
蕩或千言神與經營力誰窺斧鑿痕流行通象挂模刻
遍湘沅欲揀皆逢寶將芟不見繁居然開竅奧詎肯闕
籬藩坎井疑天大溪流笑海渾不妨兒輩撼姑付後人
論拙詠雖卑弱因公儻並存

雲

農家望汝卜年豐似絮如峰陁不同縱有濃陰工閣雨
略無定態喜隨風往來與月為仇敵舒卷和天盡蔽蒙
安得竦身騰汗漫叫開閭闔掃長空

稜冠

羽士過門賣新翻樣愈竒堅如龜屋製精似鹿胎為印
杖扶相稱唐衣戴最宜笑他蟬冕客憂畏白鬚眉

方寺丞招宿瀑上不果

久與瀑泉踈勞公下檄書極知居陋巷不似宿精廬奴
客辭看犢隣人畏借驢何時兒子壯聊為舉籃輿

詩鏡樓觀月

人世應無第二樓暮雲飛不到簾鉤未開寶鑑青冥裏
先湧冰輪碧海頭白似雪濤翻赤壁壯如夜日出羅浮
酒醒何處吹橫玉徑欲乘風萬里遊

野望

稍有西風起孤筇挾自隨名山多著寺古木必為祠鳥

過投林急樵歸度嶂遲相尋惟有月搔首待移時

西淙山觀雨

與客同登萬仞崖蔽天風雨驀然來六丁白晝誅炎魃
百怪蒼淵起熱雷毒蟒噴時林盡黑怒龍裂處石中開
吾生不及觀河決得賦斯遊亦壯哉

宿莊家二首

初秋風露變偶出憇莊家原稼無全穗陂荷有晚花疎
鐘踰澗響微月轉林斜鄰媪頭如雪燈前自績麻

茅茨迷野徑度谷復踰陂世上事如許山中人不知牛
羊晴卧野鷺鷥晚歸池粗識為農意秋輸每及時

宿山中十首

城中人怪我清旦買芒鞋君若知其趣還應日日來
玉轡上沙堤金鞍戍磧西何如寒澗底落日蹇驢嘶
就泉為碓屋累石作書龕有意耕汾曲無心起水南
市脯店猶遠刈芻人未歸夜深語童子且掩半邊扉
路危防陟遠溪黑阻窮深涼月如高士頻招未出林

宮僧殊好事絕頂廟龍君勿笑一泓水能生六合雲
崖居供給少不用犬防籬只恐偷兒黠來窺壁上詩
山中無價寶月色與泉聲莫向貴人說將為有力爭
玉筋篆文古銀鈎楷法精得知千載下時有打碑聲
淒風轉林杪露坐感衣單不道山中冷翻憂世上寒

七月二十日自瀑上先歸方寺承遺詩夸雷雨
之壯次韻一首

城裏遙看雨出時想公筆墨發雄奇山深龍虎飛騰變

海運鯤鵬瞬息移凜凜前鋒如赴敵堂堂迴勢似歸師
驅還始悟山靈意怕向蒼崖寫惡詩

秋望二首

暮色蒼然上野臺廢塘尚有數荷開望中愛殺城南柳
只怕霜風一夜來

舍南舍北種芙蓉及到秋來次第紅自是詩人才思窘
清風明月有何窮

村校書

短衣穿結半飄空所住茅簷僅蔽風久誦經書皆默記
試挑史傳亦旁通青燈窻下研孤學白首山中聚小童
却羨安昌師弟子只談論語至三公

聖賢

聖賢自牧極卑謙後學才高膽力兼悔賦不妨排賈誼
謗詩遂至劾陶潛

事見政和
御史章疏

取人最忌規模狹絕物常

因議論嚴君看國風三百首小夫賤隸採何嫌

懷李敬子

此士今徐孺柴扉肯妄開空聞羔鴈去不見鳳麟來廬
阜尋僧出東湖赴講迴何由操杖屨林下再相陪

華嚴知客寮

簷外蒼榕六月秋小年來此愛深幽壞牆螢出如漁火
古壁蜂穿似射侯涉世昏昏忘舊話入山歷歷記前遊
故人埋玉僧歸塔獨聽疎鐘起暮愁

第四句亡友趙仲白所作今補足之

聞黃德常除德安倅

幕下相從若弟兄當年曾悔誤談兵足行江北生重趼

髮為山東白幾莖病擁琴書專一壑老携檄筆付孤城
暮雲不見關山路空有天涯故舊情

閒居即事

性偶安林藪元非慕獨清米從仁祖乞粟是伯夷耕廢
井通鄰汲深牆隔市聲却因虛澹極亦自覺身輕

自勉

海濱荒淺幼無師前哲藩籬尚未窺玄詠易流西晉學
苦吟不脫晚唐詩遠僧菴就勤求記亡友墳成累索碑

金史四庫全書
卷四
天若假余金石壽所為詎肯止於斯

少日


少日關河要指呼晚歸田里似囚拘氣衰不敢高聲語
腕弱纔能小楷書座有老兵持共飲路逢醉尉避前驅
子元兄弟何為者自是嵇康處世疎

貧病

默默守柴門人間事頗更病方知養性貧始欲謀生尚
有狂奴態元無老婢聲邇來塵慮盡勿怪小詩清

示同志一首

滿身秋月滿襟風
敢歎栖遲一壑中
除目解令丹竈壞
詔書能使草堂空
豈無高士招難出
曾有先賢隱不終
說與同袍二三子
下山未可太匆匆



後村集卷四

欽定四庫全書

集部
後村集卷五
六

詳校官庶吉士臣吳烜

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣鄒世俊

欽定四庫全書

後村集卷五

宋 劉克莊 撰

詩

南嶽
舊稿

和方孚若瀑上種梅五首

仙翁小試春風手高拂茅簷矮映窻選勝多依巖罅種
愛竒或併樹身扛海山大士寒蒙衲月殿仙姝夜擁幢
商略此花宜茗飲不消銀燭綵纏缸

天賜梅花為受用繽紛玉雪被層砒素芳林下超羣品

繁蕊枝頭巧疊雙隴月照時霜翦翦澗風吹處水淙淙
主人筆力迴元化催發何須杖鼓腔

瀑映梅花何所似蚌胎蟾彩浴寒江夢回東閣頻牽興
吟到西湖始豎降雪屋戀香開紙帳月窻憐影掩書缸
若將漢晉間人比不是淵明即老龐

百匝千回看不足管他急雪濺奔瀧瓊林錯立明梁苑
寶璐橫陳照楚邦愛殺嚼芳仍嗅蕊吟狂哆口更疎龐
曉來翠羽驚飛去應為烟鐘樹杪撞

欲賦梅花材藻盡公分生意到枯椿鉅題昔只韓聯孟
妙手今唯羿愈逢守穀尚煩看杏虎護花難少吠籬
丹崖翠壁宜揮掃止要遊人筆似杠

再和五首

先生多在山中宿為愛橫斜影上窻茁髮僧從深澗徙
頽肩奴過別峯扛和羹宰相調金鼎止渴將軍擁碧幢
空谷不知如許事沽來村酒且開缸

厭看花開平地上故攀絕磴履危砒節方靜女尤專一

韻比高人更少雙堪伴愚公居北谷宜偕漫叟隱南淙
素標尚恐詩輕媒敢犯人間曲子腔

手選千株高下種似行庾嶺泛湘江只消一朶南枝折
盡受羣花北面降自愛空山吹縞袂絕羞華屋照銀缸
主林神禁人殘毀深夜應無斫樹龐

絕巔歲晚無人到但見山風激嶺瀧高臨恍如珠照垂
深葩還似寶迷邦巢居公未甘枯槁鼎寶朝方起碩虬
詩在簡齋和靖裏追攀真以寸筵撞

杖屨暇時常檢點細分枝幹數株椿試呼童子調霜弄
絕勝奴兵擂鼓逢色映巖松寒引鶴根連園杞夜聞龙
社中作者銛鋒穎甘豎降幡束短杠

賦西宗瀑布得斷字

蒼山七百畝主人新買斷于時積霧開素瀑掛青漢冷
泠瑟瑟初鏗瓏瓏珠乍貫久晴雨瓢翻忽暖水柱泮恍如
白浪湧翔舞下鳧雁又疑黃河決滎祭沉玉瓚不然蟒
出穴或是虹吸澗客言下有潭龍伏不可玩攫拏起雲

氣噴薄蕪歲旱平生愛竒心欲此築飛觀沿流踏淺清
陟巖騰汗漫低頭拜主人分此華山半

送陳寺丞守南劍

詔免延英對輕裘見吏民極知忙救旱豈是急頒春色
為搜空壤州因獻羨貧此行休戚係未敢賀朱輪

送丁元暉知南海

不用急符催先行要看梅歲時親祭海休沐必登臺鮑
井聊供飲韓碑待拭苔遙知蠻俗喜令尹帶琴來

醫

脉差死活懸三指灸誤風孿廢四支寧餌生金飧野葛
有身不可試庸醫

哭囊山覺初長老

豈謂茶毗速龕前一愴情空留尊宿貌難問小師名骨
已迎歸塔衣多唱入城百年如此過何異不曾生

又

雪峯寺裏曾相識面皺顙高五十餘削髮入山參最久

白頭出世瘦如初覺心不共真身壞遺偈猶能戰手書
何必塔銘并語錄吾詩自可表幽墟

題鍾賢良詠歸堂

水心為賦詩

細繹華堂扁徵君志可知策弘無聖詔與點有明師忽
枉賢良刺頻需拙惡詩續貂吾豈敢淚落水心碑

挽李端

要識君標履全如字畫真病能妨獻賦窮不廢修身月
旦推先輩春官失此人如聞埋玉速里巷共酸辛

黃檗寺

猶記垂髫到此山重遊客髮已彫殘寺經水後增輪奐
僧比年時減鉢單絕壑雲興潭影黑疎林霜下葉聲乾
平生酷嗜朱翁字細看荒碑倚石欄

和西外趙知宗

斤妙斲如神源深汲愈新岱宗疑有趾海若忽無津傳
遠須公等鑽堅盡此身平生師友意非為雨中巾

悼秦賢

最曉陰陽證於身獨不靈有妻持舊肆無子學遺經蟲
蝕抄方篋莎生曬藥庭城中醫絕少堪惜爾彫零

十月二十二夜同方寺丞宿瀑菴讀劉賓客集

瀑山水落霜寒夜共讀吾家夢得詩坐對遺篇忘漏盡
手遮殘燭怕風吹森嚴似聽元戎令機警如看國手棋
千載愚溪相對壘未應地下友微之

久旱即事

暘烏下飲百川空民自祠龍禱社公豈是長官渾忘却

水車聲不到城中

輸租常占一村先不望明時舉力田老畏里胥如畏虎
敗人詩思攪人眠

送楊休文

初驚字與隱侯同徐讀文編始嘆工似倩麻姑抓背癢
能令孟德愈頭風元機固已超三昧副本何因寫一通
消得劉君詩送路西歸未可嘆囊空

哭陳鑰主簿

不但心孤介生形已怪竒在為官長罵沒使邑人思魂
遠鄉猶隔名微世未知空存朋友誼到此力何施

傳諫議和余所贈傅監倉詩復用前韻

諫草如山不論兵當年出處最分明中朝安可無耆舊
故事猶應問老更敢與鳳毛評句法素知牛耳執文盟
詩壇亦合先生築遙望偏師已拔營

宿別瀑上二首

十里荒荆手共開屐痕歷歷在青苔山中猿鳥愁予去

爭問先生幾日回

兩日相疎鄙吝生今當遠別若為情
夜窻看到千峯黑
枕上猶貪落澗聲

初宿囊山和方雲臺韻

客遊萬里踐霜冰旦旦披衣坐待明
累黍功名成未易
跳丸歲月去堪驚即今紙被攜尋宿
當日油幢聽報更
賴有雲臺公好事追程來送老門生

白鹿寺

歲晚霜林落葉稠，携家來作鹿門遊。偈言恍似前生說，
詩稿猶煩侍者收。身上征衫拋未得，山中靈藥採無由。
十年不獨行人老，入定高僧白盡頭。

謂長老
洪公

答婦兄林公遇四首

霜下石橋滑，蛩吟茅店清。夢迴殘月在，錯認是天明。
恨予行李速，愧子酒杯長。日暮于誰屋，天寒陟彼岡。
自笑如窮鬼，相從不記年。每煩詩餞送，不止辦車船。
挹君如玉雪，未易得親疎。何日深山裏，同燈共讀書。

發枕峯

蒼顏奉辟書嚴裝犯蕭辰豈不謀出處歲儉水菽貧曠
黑投山中明發趨江濱漁父隱者歟葉舟方垂緡相逢
飄然逝似笑來往頻白鷗我同盟青山吾故人即之欲
與言邈若不可親昔迎歸輶喜今見行橐嗔素願悵未
諧抱慚終此身先賢遠志喻千載猶如新

嵩溪驛

舟子初辭去風吹薄酒醒一莖新髮白數點晚山青潦

倒彈長鈇荒涼宿短亭鄰雞空喔喔不似昔年聽

環翠閣

閣上有宣
和二陸詩

大陸題詩小陸和寶鞍畫戟傳呼過兩片頑碑未百年
已有牧兒來打破

崇化麻沙道中

經行愛此人烟好面俯青溪背負山半艇何妨呼渡去
小橋不碍負薪還遠聞清磬來林杪忽有朱欄出竹間
深處安知無隱者卜鄰容我設柴關

過劉尚書墓

建人墓
邵武

士林方卜道窮通一旦騎鯨萬事空
惟下有人師董相墓旁無客哭喬公
白頭稍得談經力青簡尤高絕幣功
尚記長衣橫麈柄今看華表立西風

謝墳

一月山行未有梅曉來戲著小詩催
謝家墳寺更衣處初見墻西半樹開

大乾記夢

辛酉年夢
予方十五

昔夢遊湘水琴書寄葉舟安知三十載真作夢中遊

館頭

雨雪瀟瀟驛堠長不堪流潦入車箱撫州城外黃泥路
即是人間小太行

發臨川

始我牛角來家君綰銅墨縣齋多休暇縣圃足戲劇雖
云嗜梨栗亦頗窺簡冊弟妹俱孩幼親髮方如漆後子
捧檄至軒蓋侯廣陌於時志氣銳門戶況烜赫郡花照

席紅湖柳拂鞍碧耆老互問訊酒餼紛狼籍今予挑包
過城郭宛如昔高年凋落盡滿眼少朋識管子仕瘴烟
屈叟掩泉窆門訪舊師日闇面黧黑買醪與之酌往
事話歷歷既生異縣感復起故鄉憶吾翁墓草深高堂
已斑白貧居滫髓空遠遊温清隔二季官海濱女子各
有適曾不如阿奴碌碌在母側回思盛壯時去矣難復
得因成臨川吟吟罷淚橫臆

曾景建自臨川送予至豐城示詩為別次韻

追程送我劔池邊，疊疊清談晉宋前。豈意白頭趨幕日，
迺逢紫氣出關年。夜深續炬俱忘寢，地冷吹薪久未然。
臨別祝君加帽絮，高峯雪後尚童顛。

自撫至袁連日雨霰風雪

窮臘天地閉，雲氣匝野垂。何況袁撫間，積潦盈路歧。寸
晷扳寸步，一堠費一時。忽跌落深淖，有似鳥著糝。寒日
已西匿，游子方南馳。孤店渺烟際，僮馬饑以羸。霏霏雪
沒髡，慙慙風裂肌。古人貴遺體，不肯臨深危。兒行風雪

中慈母安得知終當投紱去重補南陔詩

安仁驛

偶向溪邊洗客塵數株如玉照青蘋
淒風冷雨分宜縣
賴有梅花管領人

萍鄉

聞說萍鄉縣家家有絹機荒年絲價貴未敢議寒衣

牛田鋪大寒

萍鄉境內

暝色蟠空起
獰飈激地吹
漸看雲布濩
稍有霰紛披
藪

菽初飄瓦輕輕已點池居人朝未覺客子夜先知巧似
莊嚴就勻如剪刻為充庭永氏喜縞戶染人疑灑密苔
緘遍擎多樹壓垂高峯迷頂踵遠渡失津涯窘兔低蹲
草僵禽默墮枝馬難分牝牡烏不辨雄雌倏忽斜還整
冥濛合又離半埋官路堠亂打寺廊碑猛勢欺袍絮寒
光照髮絲店荒敲盡閉橋滑步尤危破釜羹霜菜殘爐
燎濕其廢妝憐婦怯露骭笑兒痴乍起毛皆蝟深藏手
亦龜犬驚鄰吠急雞噤野鳴遲偏滯南轅路翻思北戍

時旌旗明雁塞刁斗亂鵝池呵筆堪飛檄收燈可覆棋
暮雲蒙虎卧曉獵臂鷹隨浴鍊成何事披蓑自一竒空
山吟忍凍窮巷嚙充饑授簡悲才退烘衣感氣衰稍欣
茅瘴薄已覺麥畦滋病怕村茶冷愁嫌寺酒醜帶間三
十韻聊補昔人遺

醴陵客店

縣郭依稀隔渡頭解鞍來倚店家樓已攀桂樹吟招隱
因看梅花賦遠遊市上俚音多楚語橋邊碧色是湘流

直南鄉國三千里目送羈鴻起暮愁

湘潭道中即事

敗絮龍鍾擁病身十分寒事在湘濱若非野店粘官歷
不記今朝是立春

灘鼓鑿鑿匝廟門可憐楚俗至今存屈原章句無人誦
別有山歌侑酒尊

謁南嶽

中原昔分裂五嶽僅存一嗟余生東南有眼乃未覩清

晨犯寒慄馬上青歷歷怪雲何處來對面失嶺率午投
勝業寺僧訝予不憚茗餘因獻嘲君定非韓匹彼來既
軒露君至若封鐫余謂僧無躁茲可以理詰止僧坐悅
亭靈翳忽冰釋石廩先呈身岫嶠俄見脊須臾天柱開
最後祝融出高峯七十二固已得彷彿鄴侯何嘗死懶
殘元非寂恍疑在山中明當往尋覓咄哉三尺雪孤此
一雙屐駕言款靈瑣樓堞晃丹赤柏深不見人盡妙如
新筆珠攏千娉婷彈碁撫瑤瑟茫茫鬼神事荒幻難究

悉吾師太史公江淮徧浪迹茲焉又浮湘汗漫恣遊陟
雖然乏毫端亦頗增目力規摹五字體蟠曲萬丈碧詩
成投褚中何必題廟壁

勝業寺

寺創於何代問僧皆不知槎牙夏后柏殘缺柳侯碑雪
過禪堂冷冰餘嶽路危上封猶未到太息負心期

發嶽寺三首

嶽下無耆老何從訪舊聞不知紫巖墓更隔幾重雲

明仲竄蠻烟欽夫棄妙年空令後死者有淚滴遺編
昔者監香火今馬裂芰荷祝融應冷笑還肯再來麼

湘江

六言

屈賈死將千載劉君來泛湘江沽酒偶留村店看山不
掩船窻

烟竹鋪

野迥村疎起暮寒偶逢廢驛卸征鞍主人家比漁舟小
客子房如鶴柵窻燈與鄰通眠未易風從隙入避尤難

似聞南去加蕭索一夜披衣坐不安

衡水道中二首

一舍常分作兩程雪鞭雨袖少逢晴平生不識終南逕
來傍湖南堠子行

過了衡陽雁北迴鄉書迢遞託誰哉嶽山石鼓皆辭去
唯有湘江作伴來

黃熊嶺

黃茅迷遠近不見一人行信步未知險回頭方可驚路

由高頂過雲在半腰生落日無棲止飄飄自問程

祁陽縣

入境少人烟寒江碧際天小留因買石久立待呼船
笛起漁汀上鷗飛縣郭前若無州帖至令尹即神仙

零陵

畫圖曾識零陵郡今日方知畫未如城郭恰臨湘水上
山川猶是柳侯餘驛亭幽絕堪垂釣巖室虛明可讀書
欲買丹溪三畝地手苔茅棟徑移居

深溪驛

去廣右
界一程

苔滿朱扉半闔開更無人跡獨徘徊湘江臨別如相語
早買扁舟出嶺來

全州

寂寂全州路家家荻竹扉異僧留塔在過客入城稀傳
舍臨清泚官亭占翠微沙頭泊船者多自嶺南歸

炎關

亦名
嚴關

關北關南氣候分雪飛不過古來云若非曾發看山願

老大何因入瘴雲

秦城

缺甃殘磚無處尋
當年築此慮尤深
君王自向沙丘死
何必區區戍桂林

未至桂州葉潛仲以詩相迎次韻

柘岡西路別君時
幾見天涯柳弄絲
橫草壯心空忼慨
覆蕉殘夢懶尋思
羞將白髮趨新府
却憶青山領舊祠
猶有南來竒特事
馬頭先得故人詩

遊水東諸洞次同遊韵二首

桂山前未到今日是初遊
招鶴登青巘呼龍俯碧湫
深溪通秉炬小竇劣容舟
豈敢輕題咏同官盡柳劉
舊聞巖洞勝欲往自髻年
聳秀過靈隱幽深似善權
遠環州堞外近獻屋簷邊
倘有登臨約甘為子執鞭

春日五絕

眼邊桃李過匆匆
鏡裏衰顏豈再紅
久覺胃寒疎建焙
新因血熱戒耶筒

步入西風不見人數聲
澗鳥自啼春下山欲與唐碑語
先遣奴兵細拂塵

歸到城門欲發更馬頭
唯有暮鴉迎小窻了却觀書課
幾首殘詩旋補成

老懶何心更出嬉
閉門終日讀陶詩
湘南二月花如掃
恰似扶疎遶屋時

曉風細細雨斜斜
僂僂書生屋角花
想見水南僧寺裏
一株落盡病山茶

訾家洲二首

來訪唐時事荒洲暮靄青遍生新草棘難認舊池亭毀
記欺無主存祠怕有靈今人輕古迹此地少曾經

裴柳英靈渺莽中鶴歸應不記遼東遺基只有蛩鳴雨
往事全如鳥印空溪水無情流瀼瀼海山依舊碧叢叢
斷碑莫怪千迴讀今代何人筆力同

舜廟

粵俗安知帝遺祠亦至今青山人寂寂朱戶柏森森雨

打荒碑缺苔封古洞深曾聞張侍講來此想韶音

得家訊

不覺離鄉久南來驛使疎羈臣一掬淚慈母兩行書租
稅聞輸畢田園說歉餘何時真宦達處處奉潘輿

上巳與二客遊水月洞分韻得事字

勝踐造物慳貧交世情棄昔戒十客來且無一人至唯
我暨兩君鼎足坐水次歡言天氣佳誰謂風土異高吟
雜騷選序酌逮髻穉滌厓去惡詩捫石認缺字古來幾

襖飲傳者纔一二蘭亭感慨多未了生死事杜陵更酸
辛窮眼眩珠翠杳哉茲日游超然遺塵累消搖千載後
尚有浴沂意巖扉滑如玉歲月可鐫識

出城二絕

日日銅瓶挿數枝瓶空頗訝折來稀出城忽見櫻桃熟
始信無花可買歸

小憇城西賣酒家綠陰深處有啼鴉主人嘆息官來晚
謝了茶蘼一架花

三月十四日陪帥卿出遊

未出堯山雲既出雲徐開君侯與天通造化力可回駕
言訪巖扉羣彥森然陪旗鉞映川原笳吹喧蒿萊掃石
坐夷曠捫葛窺崔嵬訾洲久蕪沒草樹皆新培范張數
君子遺刻蒼蘚埋方羊不忍去返照明千崖沙禽就栖
宿綵鷁猶泝洄眷言宇宙間此樂何常哉鄴都會應劉
梁園命鄒枚主公富貴人襟抱尤雄猜當年篇翰存往
往鄰俳諧英英大都督羔雁招遺才雲烟生妙筆冰雪

懸靈臺况復是夕霽素魄海上來一碧九萬里空洞無
纖埃臨風惜飲量孤負黃金壘座中盡文豪授簡何徘徊
吾詩固拙速聊為石生媒

武岡葉使君寄詩次韻二首

詞客紛紛載後車誰能遠寄病相如雙旌已拜湖南牧
尺素猶題嶺外書詩句騎驢游蜀後情懷賦鵬弔湘餘
似聞闔郡春風暖便擬移家占籍居

北戎逢君歲建寅豈知今作落南人瘴來客病鄰山鬼

舶去鄉書託海神目送飛鷲偏戀土夢隨畫隼共行春
謝家兄弟如雙壁交契寧非有宿因

移居

庭下薔薇樹花開玉雪毬主人明日去相對似含愁
隣曲無來往何由有別情誰應小窻下長記讀書聲

弔錦雞一首呈葉任道

炎州產文雞毛羽固天稟朱丹飾尾距綵繡錯襟袵主
人極珍憐侷合分俸廩置諸後園中小奴司啄飲地荒

籠柵疎客見輒危
懍黠狸出沒精豪鼠
窺伺稔諒垂彼
饑涎或瞰君高枕
駭機中夕發果以斃
來論裂冠首立
碎齧嗉聲已噤酷哉
三尺喙殘此一段錦
長嗟命瘞埋
詎忍付烹飪始為文
采累終欠智慮審老
瞞戕孔公千
載憤凜凜黃祖殺處
士麓暴犯流品况兹
毒鷲物尤索
防閑甚善視雙翠衣
夜凉勿嗜寢

哭孫行之二首

已了燈窻債心知舉業非
立朝多諫草取友必深衣
蘆

甕貧時共書筒貴後稀病身偏惜淚一為故人揮
世上高科衆君尤自貴珍如何一夕裏忽盡百年身雙
旒齊眉友孤燈擁髻人傷心唯孟母頭白送歸閩

即事

嶠南氣候異中州多病誰令作遠遊瘴土不因梅亦濕
颶風能變夏為秋方眠壞絮俄敷簟已著輕絺又索裘
自嘆幻身非鐵石天涯豈得久淹留

楮樹

楮樹婆娑覆小齋更無日影午窻開一端能敗幽人意
夜夜墻西礙月來

象奕一首呈葉潛仲

小藝無難精上智有未解君看橘中戲妙不出局外屹
然兩國立限以大河界連營稟中權四壁設堅械三十
二子者一一具變態先登如挑敵分布如備塞盡銳賈
吾勇持重伺彼怠或遲如圍莒或速如入蔡遠砲勿虛
發冗卒要精汰負非繇寡少勝豈繫强大昆陽以象奔

陳濤以車敗匹馬郭令來一士汲黯在獻俘將策勛得
雋衆稱快我欲築壇場孰可建旗蓋葉侯天機深臨陣
識向背縱未及國手其高亦可對狃捷敢饒先誨輸每
索再寧為握節死安肯屈膝拜有時橫槊吟句法尤雄
邁愚慮僅一得君才迺十倍羈圖務并弱兵志貴攻昧
雖然屢克獲詎可自侈汰呂蒙能勝蜀衛瓘足縛艾南
師未宜輕夜半防斫寨

送陶仁父

自古送行情味惡君行快似泛仙槎
新班人少先投卷下水船輕易到家
南浦不堪看草色西湖尚可及荷花
諸公若問栖栖者為說吟詩兩鬢華

書壁

練衣蒲屨小綸巾四壁清風一榻塵
誰謂先生貧到骨
百金新聘竹夫人

移竹

借居未定先栽竹為愛疎聲與薄陰
一日暫無能鄙吝

數竿雖小亦蕭森
窻間對了添詩料
郭外移來費俸金
自笑明年何處在
虛簷風至且披襟

後村集卷五

欽定四庫全書

後村集卷六

宋 劉克莊 撰

詩

南嶽
舊稿

癸水亭觀荷花

執熱屏人事偃卧慵巾裳過門二三友失喜跣下牀鳴
騶出華陌聯轡遵野塘崇軒俯萬荷濯濯涵波光都忘
瘴海中疑墮玉井傍遠無膏粉氣近有冰霜涼製葉可
以衣采葍可以嘗離騷譜靈草品介列衆芳似曾識三

閨安肯肖六郎詞人更儂薄比咏猶妃嬙曷不觀茲華
意色和而莊風吹月露洗豈若冶與倡衆方慕絕艷誰
能參微香余詩縱枯淡一掃時世妝

棲霞洞

往聞耆老言茲洞深無際閨中或失路塵外別有世幾
思絕人事齋糧窮所詣棋終出易迷炬絕入難繼孤亭
渺雲端于焉小休憩憑高眺城闕擾擾如聚蚋盡捐滓
穢念遂有飛舉勢山靈媚清遊雨意來極銳濛濛濕沙

草泖泖涼松桂暝色不可留悵望巖扉閉

堯廟

帝與天同大天存帝亦存桑麻通絕徼簫鼓出深村水
至孤亭合山居列岫尊尚餘土階意樵牧踐籬樊

五月二十七日游諸洞

來南百慮拙所得唯幽尋矧余玉雪友共此丘壑心江
亭俯虛曠穴室窮邃深是時薄雨收白靄籠青岑棄筇
追野步却扇開風襟炎方豈必好差遠鞀鼓音且願海

道清莫問神州沉徘徊惜景短留滯畏老侵昨遊感鶯
啁今至聞蟬吟常恐官事繫佳日妨登臨譬如逃學兒
汲汲貪寸陰何因釋膠擾把臂偕入林

泛西湖

桂湖亦在西豈減潁與杭丹橋抗崇榭綠波浮輕航休
沐陪勝餞軒蓋何熒煌停橈藕花中一目千紅裳詎知
白晝永但覺朱夏涼古洞半蕪廢仙人今在亡踞石散
醉髮吸澗澆吟腸延緣繚溪步詰曲經禪房野鳥啼密

竹高蟬鳴踈楊雖無絲管樂談論諧宮商諸君敏于詩
援筆如飛翔顧余乏華藻山雞追鸞皇頗能讀古碑所
恨侵夕陽明發復擾擾前遊未可忘

題許介之詩藁

益公稱其詩

我留鳶跼外君住雁迴邊走僕行千里敲門授一編真
妍非粉黛至巧謝雕鐫何必周丞相男兒要自傳

慈氏閣

馬氏建

閣建五季時丹碧見層累吾行半區中鉅麗莫與比想

金定巳辰合言 卷六
方營綜時伯心極雄侈但思窮耳目寧論竭膏髓一朝
陵谷變飛電掃僭壘湘波日夜流不洗爭篡恥唯存浮
屠居願力久未毀夕陽弔陳迹危檻聊徙倚遙憐下界
熱高處涼如水若非逼巖鑰坐待鐘聲起

脩然亭

每到闌干外徘徊暮始還為憐隣水寺盡見隔城山牆
繚青苔裏每藏綠樹間松扉宜步月只是限重關

辰山

一峯疊三洞迺似弘景樓下洞初俯入蘚室寒颼颼中
洞忽躍出有逕通玄幽豁然崖谷判萬態誰鑄鏤或植
如寶幢或綴如珠旒或如鯤鯨飛或如龍鱗游石橋狀
天台木棧疑蜀州稍憇大士巖遂經羽人丘力窮至上
洞身載雲氣浮未必山水緣勉為塵世留平生避地心
茲焉宜菟裘長斧樵青壁短策耘綠疇獨恨汲路遠溪
澗皆背流會當逢異人卓錫成靈湫

千山觀

西巖林密擅一城渺然飛觀入青冥于湖數字題華棟
陽朔千山獻畫屏境勝小詩難寫盡天寒薄酒易吹醒
獨遊不恨無人語滿壑松聲可細聽

曾公巖

廣室內嵌空層峯外崔嵬仰視駭懸石俯踐愁滑苔古
竇風肅肅陰澗泉洄洄飛梁跨其間上可陳樽壘愛涼
復畏濕當暑重裘來名巖者誰歟兄固弟子開憶昔建
中初國論幾一迴惜也祖荆舒卒為清議排至今出牧

地姓字留蒼崖躊躇增慨嘆日入禽聲哀

郊行

薄有西風意郊行得自娛山晴全體出樹老半身枯林
轉亭方見江侵路欲無何妨橋纜斷小艇故堪呼

秋日會遠華館呈胡仲威

嶺表豈必熱庚伏頻滂沱薄莫辱招要益李參瓶荷君
侯如長松折節交藤蘿奇字識夏鼎古音彈雲和今日
素商至高屋涼意多夜清羣籟息已有蛩鳴莎人生不

飲酒賢愚同消磨拍手問湘纍獨醒欲如何
謬承青眼顧詎惜蒼顏配客散我亦歸耿耿看斜河

老大

老大重登聘士臺客懷牢落可曾開
臨流往往看鳶墮入署時時見馬來
有約青山何日去無根白髮是誰栽
自嫌不帶功名骨只合眠莎與坐苔

伏波巖

懸崖萬仞餘江流繞其趾仰觀不見天
森秀拔地起中

洞既深豁旁竇皆竒詭惜哉題識多蒼玉半鏡毀安得
巨靈鑿永削崖谷恥緬懷兩伏波往事可追紀銅柱成
浪泊樓船下湟水時異非一朝地去亦萬里山頭博德
廟今為文淵矣謂我詩弗信君請訂諸史

詰貓

古人養客乏車魚今汝何功客不如飯有溪鱗眠有毯
忍教鼠齧案頭書

八桂堂呈葉潛仲

金華丞
相之孫

之子初度日畏客如避仇朱門禁入謁青山招出遊置
醴泉石間涼意生觥籌風檻絳華馥冰盤丹實游起誦
眉壽篇酌君介千秋煌煌丞相孫少也宜襲侯黑頭去
云遠白髮來何稠君言權位盛孰若志意修靜觀鐘鼎
族起滅猶輕漚祝君象韓呂不羨熺與攸

挽聶孺人

平樂董
令之內

已病猶蔬素西歸不復疑飛鳧踰嶺遠別鶴返鄉遲箴
史傳賢女巾禱付侍姬白頭潘令在應有悼亡詩

題胡仲威文藁

熟讀執事文恍如入寶山瑰異千萬種一一無可刪瑤
草既俯拾珠樹亦仰攀美玉不知數照映穹壤間大者
中圭瓚小者堪珮環居然郊廟器胡為委荆菅嗟余頗
識寶對之清涕潛携寘蔀屋內虹氣驚市闌常恐陽虎
輩竊去亡繇還何當變姓名袖出函谷關

戴秀巖

戴秀者兵卒也
也得道于此

茲巖視諸峯厥狀尤崢嶸舊為碧蘚封新有朱棧橫縻

腰尚恐墜束炬劣可行外狹中乃寬始闇俄忽明仰窺
神魄悸俯顧形殼輕遂覽丹爐基微聞玉鼓聲源深足
力盡路黑雲氣生不辨晝夜分恍疑世代更嘗聞學神
仙所得由專精豈吾諸名士羨彼一老兵欣然約同志
嗣此將尋盟安知無白鹿絕頂來相迎

寄左次魏二首

多謝齊安牧交情未濶踈方籌江北事肯寄海南書開
幙交鋒處修城劫火餘別來各添歲筋力近何如

同事征西府聞君已繡衣小侵今視昔大捷是耶非首
長輿尸返偏裨奏凱歸六關天樣險莫遣敵能飛

中秋湘南樓餞張昭州

臺使選良牧詔下帝曰俞高牙植華艦餞者來傾郭明
月滿麗譙寒光映尊壺桂人願少留昭人望疾驅一室
可為政况乃有國都嶺民日以耗丁口強半無洋洋紫
雲詔侯其勒座隅道鄉遊息處暇日披榛蕪鄙拙忝投
分臨風獨踟躇頗念友離索寧論鬼挪揄何繇扣鈴閣

百榼傾兵厨

郡酒絕佳

榕溪閣

山谷南遷
維舟榕下

榕聲竹影一溪風
遷客曾來繫短篷
我與竹君俱晚出
兩榕猶及識涪翁

哭譚戶錄二首

讀過書皆記非唯善
屬文有名登進士
無命作參軍
白髮行秋署青衫
殮瘴雲可憐
膏火下虛費
一生勤

曾次有千年囊中之一錢
客來論旅殯
官為僱歸船
通

德梳新髻童烏拾舊編傷心隣巷裏廢宅鎖寒烟

風

風于天地間唯桂尤其雄將由巖竅多或是地形穹不
知起何處但覺來無窮浮埃晦白晝竒響激半空一怒
動旬浹小亦數日中城堞凜欲壓况此半畝宮嘗聞古
至人御氣猶輕鴻劉季晚可憐擊筑悲沛豐我老斷恐
怖視身等枯蓬飄擲付大塊奚必分西東

觀射

浪箭束如林傍觀笑不禁蠻平無事久卒情可憂深各
自分牛鬻何曾貫蝨心种侯清澗法能廢幾黃金

荔支巖

洞内小石如
荔支者無數

異境闕神奇一罅通深阻呀然張蟾吻光怪腹中貯始
來尚覲面稍進但聆語迴頭失塵世束緼行里所石房
容丁客石柱徑丈許眠爨若將吠墜果疑可咀平生聞
化城今見玉樓櫓陟高既趨捷循狹或偃僂忽逢路窮
處淺浪隔洲渚心知仙聖居欲到無飛羽向非薪燭力

往返何異瞽重游倘未卜聊向詩中覩

再游棲霞洞

直路幽陰側路明玉為牆壁雪為城殷勤報有詩翁到
萬一仙人肯出迎

佛子巖

環郭洞府多所患在卑濕斯巖獨虛敞他境未易及穹
如層屋構廣可百客集開竇送雲出掃壑延月入穴居
倘堪謀徑欲老樵汲絕頂猶玲瓏苔磴不記級惜為僧

所澆飛棟綠葉皮佞佛墮痴想明鬼趨陋習遂令登眺
者欲往足若繫何當一燎空盡見萬仞立

劉仙巖

絕頂來尋練藥蹤老仙端的是吾宗寄聲月白風清夜
定許相期第幾峰

龍隱洞

先賢評桂山推爾居第一豁然碧瑤戶夾以雙玉壁中
有無底淵黑浪常蕩瀟諒當剖判初倍費造化力雷噴

斧山開龍怒裂石出至今絕頂上千丈留尾脊寧論兒
女子壯夫股為慄我來欲題名腕弱墨不食摩挲狄李
碑文字尚簡質今人未知貴後代加寶惜泆流工駭舟

久遊覺蕭瑟巖室寬如家迴棹聊愒息

狄武襄公平蠻
碑李師中待制

宋頌
在焉

哭梁運管伋

丞相克
家之孫

憶共游山如昨日奄歸白晝隔存亡宅深外不知何病
醫雜人爭試一方弔客傷心同瀝酒愛姬收淚各分香

淳熙丞相潭潭府今日門庭冷似霜

琴潭

山形若覆奩潭面如拭鏡竒哉几案物千古棄荒蕪了
無扳躋勞坐愜幽野性泉源黑難窮崖色碧相映闔深
畏龍蟄窺淺見魚泳可憐風水聲空山誰來聽我欲居
茲丘掃迹逃囂競未言葺茆齋先可理漁艇

清惠廟

來訪古祠宮迢迢過水東一條溪不斷數里竹方通巫

拜分餘胙商行禱順風妝樓空百尺半仆夕陽中

辰山道人

道人何為者寒暑一破衫髮白具老態口訥稀冗談我
陪小隊來猿鳥窺層巒道人方掩戶燕坐彌陀龕迎客
不下山送客不出菴即之疑槁木面目寒嶢巖贈錢漠
然謝有若投諸潭微言歲計熟收芋已滿籃斯人未識
字豈必曾遍參所立偶自高可做佞與貪

玄山觀

宋之問
別墅

來瞻石像看唐碑一徑蒼松映碧漪聞說宋公曾住此
寄聲過客細吟詩

榕溪隱者

榕溪有隱者幽事在溪曲治地可十畝方整如碁局始
行入荆扉漸進至茅屋樹之百盆蘭繚以萬竿竹解衣
憇繁陰擁鼻參微馥主人聞客來引避若駭鹿却詢守
舍兒云已出賣墨壁間見其像條褐巾一幅安知非回
仙寄跡混塵俗矢詩慕高風君歸倘肯讀

楔亭

南軒
所立

年年春草上亭基
父老猶能說左司
寂寞當時修楔處
一間老屋兩殘碑

自用臺字韵一首

脫了荷衣事將臺
羈留又見嶺梅開
詩因癸水辰山作
訟自雷州電縣來
架上書從人借讀
牆邊竹是俸移栽
小窻睡起無情味
閒聽饑禽啄砌苔

簦帶亭

上到青林杪，凭欄盡桂州。
千峰環野立，一水抱城流。
沙際分漁艇，烟中見寺樓。
不知垂去客，更得幾迴游。

程公巖

石室外甚狹，中廣如毬場。
偉哉鉅麗居，天造無棟梁。
巖冬既深燠，盛夏尤虛涼。
偶至不忍去，杖屨猶方羊。
人能專此壑，何必政事堂。
先須置禪龕，次第營丹房。
烟霞入几席，塵土麾門牆。
學道縱未得，著書亦可藏。

哭林推官晉之

去歲衝寒赴辟時感君騎馬遠追隨
一春不得梅花信
萬里空題薤露詩
小簡佩壺邀士友
大鐺煮粥活流移
平生二事猶堪記
應有公名與撰碑

鵲

久不聞烏鵲朝來噪不休
殊鄉無喜事應為買歸舟

榕臺二首

拔地高崖如鐵色
拂天老樹作寒聲
他年記宿榕臺夜
便是南歸第一程

囊無金累貧如故鏡有絲生老奈何一事尚堪誇北客
來時詩少去時多

巖關新洞

羽客初尋見因于此葺廬未能平險峻先擬架空虛磴
路樵相引山名尉自書看來臨驛道未必有仙居

乳洞

千峯夢裏尚崔嵬不記青鞋走幾迴天恐錦囊猶欠缺
又添乳洞入詩來

發湘源驛寄府公

走本山中人感激趨燕臺謬辱弓旌招愧乏諫議陪先
生如春風盎然噓陳亥曉入開玉帳夕話肩鈴齋下塌
驚一府撰杖窮千崖豈曰君畜伋實唯子視回歲晚謀
北轅淒其難為懷欲言先菀結既決猶徘徊是日戒行
李送者皆鄒枚兵厨遣珍餉祖席羅寶釵下令許卜夜
寧畏街鼓催詰旦枉苒轟山亭陳金壘都人如堵墻謂
我何榮哉未聞從事去親致元戎來繾綣談至夜霜月

照露苔長跪抱馬足離緒焉能裁麗譙落天杪悵望空
倚梳昔人死知己骨朽名不理公有管樂姿愚非温石
才他時倘後雕安敢忘栽培

鐸嘴

史祿渠至此分水

世傳靈渠自秦始南引灑江會湘水楚山憂赭石畏鞭
鑿崖通塹三百里篙師安知有史祿割牲沉幣祀瀆鬼
我舟閣淺懷若人要是天下奇男子只今渠壞無人修
嗟乎秦吏未易訾

書堂山

柳開守清
湘讀書處

子厚文章宗仲塗豈後身不肯作崑體寧來牧湘濱咏
茅翠麓巔日與書卷親刻去五季衰挽回六籍醇歐尹
相繼出孤唱繇伊人風流喟已遠尚喜棟宇新千峰高
叢叢一江碧粼粼禽魚暨草樹纖悉几案陳澗泉既可
汲山木亦可薪熟讀壁間藏痛掃毫端塵勗哉山中友
勿厭泉石貧

湘中口占四首

少年裘馬事清狂
晚看梅花到瘴鄉
一任海風吹面黑
免教人謗作何郎

船頭吹火盧仝婢
馬後肩書穎士奴
安得世間名畫手
寫余出嶺泛湘圖

江邊金碧謾層層
戶口稀疎塔廟增
楚俗不知黃面老
家家香火事湘僧

無量壽
佛是也

津吏沙邊立指呼
放船出鎖要州符
書生行李堪抽點
蕙苾明珠一例無

見方雲臺題壁

寄書迢遞夢參差
每見留題慰所思
不論驛亭僧寺裏
有山水處有君詩

土馬村

村墟薪濕米如金
猶記來時臘雪深
曾有小詩題歲月
店荒無壁可追尋

祁陽道中

昨過知岑寂
重來况雪天
人居雞柵裏
路在鳥巢邊
草

市開還閉茅山斷復連
瀟湘清似鏡悔不問歸船

愚溪二首

草聖木奴安在哉
荒榛無處認池臺
傷心唯有溪頭月
曾識儀曹半面來

青雲失脚謫零陵
十載溪邊意未平
溪不預人家國事
可能一例受愚名

浯溪二首

上置書堂下釣磯
漫郎陳迹尚依稀
無端一首黃詩在

長與江山起是非

形容唐事片言中元子文猶有古風莫管看碑人指點
寫碑人是太師公

石鼓

石鼓名天下州庠畫不如古祠猶漢舊石刻半唐餘翠
巖供憑几寒江照讀書恨余非楚產來借一房居

湘南江西道中十首

獨醒公子去沉湘未識人間有醉鄉酒與離騷難捏合

不如痛飲是單方

賈生廢宅草芊芊
路出長沙一悵然
今日洛陽歸不得
招魂合在楚江邊

少陵阻水詩難繼
子厚遊山記絕工
斷壁殘圭零落錦
新碑無數滿湘中

去年冬至投僧寺
今歲陽生宿店家
獨夜無人堪晤語
青燈相對結寒花

蠻府叅軍鬢髮蒼
自調欸乃荅漁郎
從今詩律應超脫

盡吸瀟湘入肺腸

丁男放犢草間嬉
少婦看蠶不畫眉
歲暮家家禾絹熟
平鄉風物似豳詩

每嘲介甫行新法
常恨歐公不讀書
浩嘆諸劉今已矣
路傍喬木日凋踈

茫茫衰草與雲平
斗氣千年不復明
唯有多情江上月
相隨客子過豐城

派裏人人有集開
竟師山谷友誠齋
只饒白下騎驢叟

不敢勾牽入社來

上封已失岳僧期
客問丹霞謝不知
懶到登山臨水處
始驚筋力減來時

曉雞

絳憤昂然韻節清
不因風雪廢長鳴
初聞烟岫猶啣月
久聽山城漸殺更
驚起征夫茅店夢
喚回老將玉關情
年來無復中宵舞
自笑功名一念輕

哭表司直元量

築室山下孤標未易親
長閒如野鶴偶出似祥麟
屬者陪髦士嗟呼瘞玉人
北風吹老淚空滴暮江濱

豫章二首

湖光如鏡了無塵
照見先生白髮新
歲晚騎驢行萬里
始知孺子是高人

交遊回首散如烟
重過洪州隔世然
手種垂楊皆合抱
朱顏安得似當年

還杜子楚詩卷

老眼昏花廢課程小窻久矣斷書聲夜來忽得君詩卷
自起挑燈讀到明

訪李公晦山居

烏州在橋北我僕云路迂語僕爾何知彼有高士廬問
樵得處所林樾尤扶踈脩竹僅萬箇古梅非一株小畦
植蔬果復有水可漁下馬式籬藩攝袂尋庭除不聞雞
犬聲茶烟起庖厨伊人道義富豈比山澤癯蕭然蓬蒿
中尚友泗與洙古來連雲第翕赫衆競趨漸臺暨郾塢

變滅纔須臾聖門不朽事迺屬陋巷儒願君長保此是
亦顏之徒

道傍梅花

風吹千片點征裘猶記相逢在嶺頭歲晚建州城外見
向人似欲訴離愁

戲書客舍

已去光陰挽不回漸驚老態逼人來決河猶有方堪塞
脫髮應無術可栽北戍寶藏唯檄草南游裊載是詩材

客愁何物禁當得聊向旗亭買一杯

懷安道中

閩溪瘴嶺客程賒晚泊懷安喜近家大屋書旗夸酒米
小舟鳴櫓競魚蝦溪移驛已臨高岸潮退帆多聚淺沙
快著征衫鞭瘦馬要看二十里梅花

哭方澤孺先生二首

弟子成名衆先生獨命窮廣場雙鬢禿陋巷一瓢空雞
饌為親設牛衣與婦同嗟乎猶嗇壽神理竟難通

方訝書來少殊鄉訃忽聞素幃無祭主破笥散遺文已
閉三間屋誰封四尺墳舊存傳業者南北各離羣

真隱寺

出郭斜陽已在山夜深乘月到江干奴敲小店牢扃戶
僧借虛堂徑掛單駭浪急回因膽薄逆風小住為心寬
投牀一枕瀟湘夢無奈霜鐘苦喚殘

道傍松

入閩多古松夾道踈復密未嘗識兵火既久蔽雲日蝨

茲情游民深夜腰斧出斲根取脂肪竊負如鬼疾譬如
人則趾僵卧立可必供君一瞬光天彼千歲質暴殄聖
垂誠樵採官著律徼吏嗜雞豚孰視不訶詰登高俯達
路巨餘日蕭瑟哀哉暑行人暍死誰汝恤

枕峯寺

夜深投寺解行裝一點寒燈照上方老宿問余何處去
年年來此借禪牀

乍歸九首

官滿無南物飄然匹馬還唯應詩卷裏偷畫桂州山
兒童娛膝下母子話燈前却憶江湖上家書動隔年
北戍邊城下南遊瘴海頭不知天地內何處可逃愁
絕愛墻陰橘花開滿院香鄰人欺不在稍覺北枝傷
孚若如天馬軒昂不可羈為貧踈飲客因病出名姬
弛擔逢除夕檀藥共擁爐把如為客看還得自家無
架書多散亂信手偶拈開匹似前生讀茫然記不來
手種梅無恙蒼苔滿樹身可憐開較早不待遠歸人

格力窮方進功夫老始知儘教人貶駁喚作嶺南詩

題坡公贈鄭介夫詩三首

玉座見圖嘆纍纍菜色民如何崔白輩只寫蔡奴真
向來與相國投分自鍾山不入翹材館甘為老抱關
下吏語尤硬投荒身轉輕不然玉局老肯喚作先生

後村集卷六